

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona”, broj: 7/10), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 40. sjednici, održanoj dana 23.01.2020. godine, d o n o s i

ZAKLJUČAK

I.

Prihvata se Mišljenje Ministarstva za poljoprivredu, šumarstvo i vodoprivredu Zeničko-dobojskog kantona, po prijedlogu Stručne službe Gradskog vijeća Zenica broj: 12-49-24780/19 od 05.12.2019. godine, za Program rada Skupštine za 2020. godinu, koji se odnosi na izmjene i dopune Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07).

II.

Zaključak sa Mišljenjem Ministarstva za poljoprivredu, šumarstvo i vodoprivredu, broj: 05-1-34-16430-1/19 od 10.01.2020. godine, upućuje se Kolegiju Skupštine Zeničko-dobojskog kantona, na dalje postupanje.

III.

Zaključak stupa na snagu danom donošenja.

PREMIJER

Mirza Ganić

Broj: 02-_____/20
Datum, 23.01.2020. godine
Z e n i c a

DOSTAVLJENO:

1x Ministarstvo za poljoprivredu, šumarstvo i vodoprivredu,
1x Kolegij Skupštine,
1x Stručna služba Gradskog vijeća Zenica, putem ministarstva,
1x a/a.



Broj: 05-1-34-16430-1/19
Zenica, 10.01.2020. godine

Stručna služba Vlade Zeničko-dobojskog kantona je aktom broj: 02-1-34-16430-4-2/19 od 09.12.2019. godine, zatražila od Ministarstva za poljoprivredu, šumarstvo i vodoprivredu da iz svoje nadležnosti pripremi akt za sjednicu Vlade o prijedlozima Službe za ekologiju, komunalne i inspekcijske poslove grada Zenice za Program rada Skupštine za 2020. godinu, u dijelu koji se odnosi na prijedloge za izmjene i dopune Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07), o čemu Ministarstvo za poljoprivredu, šumarstvo i vodoprivredu daje slijedeće:

MIŠLJENJE

U vezi sa prijedlozima Službe za ekologiju, komunalne i inspekcijske poslove grada Zenice za Program rada Skupštine za 2020. godinu, koji se odnose na prijedloge za izmjene i dopune Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07), ovo Ministarstvo daje slijedeće mišljenje:

1. Prijedlog broj 1. glasi: „*Prema zakonu postoji obaveza donošenja odluke o odvodnji otpadnih voda -član 28. zakona*“ sa obrazloženjem: „*Smatramo da bi zakon, a u cilju izbjegavanja različite prakse lokalnih zajednica u odnosu na sadržaj i suštinu tog akta, trebalo da propiše detaljniji sadržaj i način donošenja odluke o odvodnji*“.

U članu 28. stav (3) Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07) utvrđeno je da Odluku o odvodnji otpadnih voda na području općine donosi Općinsko vijeće, a odluku o odvodnji otpadnih voda s područja više općina, donosi Vlada Kantona, što je u skladu sa članom 54. stav (3) federalnog Zakona o vodama („Službene novine Federacije BiH“, broj: 70/06), kojim je regulisano slijedeće: „Odluku o odvodnji otpadnih voda na području grada, odnosno općine donosi gradsko, odnosno općinsko vijeće. U slučaju da se istim sistemom javne odvodnje otpadnih voda odvodi voda sa područja više općina odluku donosi organ određen propisom kantona“.

Iz navedenih zakonskih odredbi je vidljivo da je citiranim federalnim Zakonom o vodama utvrđena nadležnost za donošenje odluke o odvodnji i da je Zakon o vodama Zeničko-dobojskog kantona usklađen sa istim. Posebno ističemo da Zakon o komunalnim djelatnostima („Službene novine Zeničko-dobojskog kantona“, broj: 17/08) uređuje pitanja obavljanja komunalne djelatnosti u koje spada „odvođenje i prečišćavanje otpadnih voda“, iz čega proizilazi da nema osnova za izmjenu Zakona o vodama Zeničko-dobojskog kantona, kao u predmetnom prijedlogu.

2. U prijedlogu broj 2. vezano za sredstva vodnih naknada i prihoda prikupljenih po osnovu zakupa javnog vodnog dobra navedeno je slijedeće: „*Postojeća zakonska rješenja nisu adekvatno, precizno i transparentno regulisala pitanja finansiranja upravljanja vodama, posebno u dijelu raspodjele sredstava vodnih naknada i prihoda prikupljenih po osnovu zakupa javnog vodnog dobra. Sve informacije koje se odnose na ukupno prikupljena sredstva i raspored istih prema pripadajućem dijelu nisu dostupne općinama/gradovima.*

Predlažemo izmjene zakona kako slijedi:

- da se ova sredstva koja prema feralnom zakonu pripadaju kantonu, raspoređuju u korist budžeta Kantona i budžeta općina/gradova, tako da općinama/gradovima pripada najmanje 60% tih sredstava, zavisno od ostvarenih prihoda na području općine/grada,
- da se prenos sredstava na budžete općina/gradova vrši najmanje jednom sedmično u toku sedmice,
- da se sredstva koriste namjenski, uz obavezu podnošenja izvještaja nadležnom kantonalnom ministarstvu koji bi vršio kontrolu namjenskog korištenja sredstava.“

Finansiranje upravljanja vodama u cjelosti je precizno i transparentno regulisano u poglavlju XII federalnog Zakona o vodama („Službene novine Federacije BiH“, broj: 70/06), pri čemu nije ostavljena mogućnost kantonima da svojim zakonom ili propisom na drugi način uređuju ovo pitanje. Tako je u članu 177. stav (1) federalnog Zakona utvrđeno da se vodne naknade i prihodi prikupljeni na osnovu zakupa javnog vodnog dobra na površinskim vodama I kategorije raspoređuju tako da nadležnoj agenciji za vode pripada 40%, u korist budžeta kantona 45% i u korist Fonda za zaštitu okoliša Federacije 15%, dok je u stavu (2) utvrđeno da prihodi od zakupa javnog vodnog dobra na površinskim vodama II kategorije u cjelosti pripadaju budžetu kantona.

Nije utemeljen navod da „Sve informacije koje se odnose na ukupno prikupljena sredstva i raspored istih prema pripadajućem dijelu nisu dostupne općinama/gradovima“, jer u konkretnom slučaju od ovog Ministarstva grad Zenica nije nikada tražio nikakvu informaciju o ovom pitanju, niti je takva informacija uskraćena bilo kojoj općini, a postupak davanja javnog vodnog dobra u zakup provodi se prema Pravilniku o načinu i uslovima ograničenog prava korištenja javnog vodnog dobra („Službene novine Federacije BiH“, broj: 26/09), kojim je propisana transparentnost i javnost postupka ustanovljavanja ograničenog prava korištenja.

S obzirom da Zakon o vodama Zeničko-dobojskog kantona uopće ne sadrži odredbe o prikupljanju sredstava vodnih naknada i prihoda od zakupa javnog vodnog dobra i njihove raspodjele, budući da su ova pitanja u cjelosti regulisana federalnim Zakonom o vodama, to ovo Ministarstvo smatra da predmetni prijedlog za izmjene Zakona o vodama Zeničko-dobojskog kantona nije opravdan.

Dostavljeno:

1 x Vlada Zeničko-dobojskog kantona,
uz prijedlog Zaključka,
1 x a/a.

Obrađivač akta:


Senada Dizdar



MINISTAR

Mirnes Bašić

